

11 MAY 2001

PERDANA MENTERI ST LUCIA LAWAT LANGKAWI

LANGKAWI, 11 Mei (Bernama) -- Perdana Menteri St Lucia, Dr Kenny D. Anthony dan isteri Rose Marie hari ini melawat beberapa tempat menarik di pulau lagenda Langkawi.

Dr Anthony diiringi anggota Exco kerajaan negeri Kedah, Ahmad Bashah Mohamed Hanipah dan Pengurus Besar Lembaga Pembangunan Langkawi (Lada), Datuk Zainal Karib Abdul Rahim.

Beliau dan isteri melawat Dataran Lang dan mengambil gambar pemandangan kawasan itu.

Dr Anthony juga meluangkan masa lebih setengah jam melawat Lagenda Langkawi dalam Taman, taman seluas 20 hektar di tapak tambak laut yang dihiasi seni lanskap, monumen kreatif tempat-tempat bersejarah Langkawi dan Galeria Perdana, muzium yang menempatkan koleksi cenderamata Perdana Menteri Datuk Seri Dr Mahathir Mohamad.

Sebelum itu, Dr Anthony mendengar taklimat yang diberikan oleh Zainal Karib dan pegawai perhubungan Lada Shamsuddin Shuib mengenai pembangunan Langkawi sebagai destinasi pelancongan antarabangsa di Kompleks Lada.

Esok, tetamu negara itu dijadual melawat pusat kraftangan di Teluk Yu sebelum berlepas ke Kuala Lumpur.

-- BERNAMA

NH MOZ